



ქალაქ ფოთის მუნიციპალიტეტის საკრებულო



განკარგულება №19/75

2020 წლის 25 ნოემბერი

ქალაქი ფოთი

ქალაქ ფოთის მუნიციპალიტეტის საკრებულოში წარდგენილი 2020 წლის 2 ნოემბრის პეტიციის (მომხსენებელი: ელისო ჯანაშია, მცხოვრები: ქალაქ ფოთის მუნიციპალიტეტი, ბარათაშვილის ქუჩა №37-ში) შესახებ

ქალაქ ფოთის მუნიციპალიტეტის საკრებულოს 2020 წლის 2 ნოემბრს წარდგინა ელექტრონული პეტიცია ვებგვერდის <http://petition.lsg.ge/poti/> მეშვეობით.

„ქალაქ ფოთის მუნიციპალიტეტის საკრებულოს რეგლამენტის დამტკიცების შესახებ“ ქალაქ ფოთის მუნიციპალიტეტის საკრებულოს 2014 წლის 24 დეკემბრის №21/56 დადგენილებით დამტკიცებული რეგლამენტის 119^ე-ე მუხლის მე-12, მე-13, მე-14 პუნქტების, 119^ე-ე მუხლის შესაბამისად, პეტიციის ტექსტის მოქმედ კანონდებლობასთან და ხელმოწერების დადგენილ მინიმალურ რაოდენობასთან შესაბამისობაზე პასუხისმგებელია მომხსენებელი. პეტიციის ელექტრონულ ფოსტაზე მიღებიდან 3 სამუშაო დღის ვადაში საკრებულოს აპარატი იწყებს საკრებულოს რეგლამენტით დადგენილი წესით პეტიციის რეგისტრაციას.

პეტიცია და პეტიციაზე ხელმოწერათა რაოდენობა შეესაბამება საქართველოს კანონდებლობით დადგენილ მოთხოვნებს. ამდენად, პეტიცია დარეგისტრირდა საკრებულოს აპარატში.

2020 წლის 2 ნოემბრის ელექტრონული პეტიციით მოქალაქეები ითხოვენ:

1. დროის მოკლე მონაკვეთში (მაქსიმუმ ერთი კალენდარული თვე) მუნიციპალიტეტის ორგანოში შეიქმნას სამუშაო ჯგუფი (არასამთავრობოებისა და ადგილობრივი სამოქალაქო აქტივისტების ჩართულობით), რომელიც შეისწავლის და საჯაროდ წარმოადგენს ანგარიშს წლების განმავლობაში ქალაქში არსებული გაუსაძლისი სუნის გამომწვევი მიზეზების, ამ მხრივ გაწეული საქმიანობისა და პრობლემის აღმოფხვრის გზების შესახებ;

2. დროის მოკლე მონაკვეთში (მაქსიმუმ ერთი კალენდარული თვე), მუნიციპალიტეტის ორგანოებმა, ცენტრალური ხელისუფლების სათანადო ორგანოებთან ერთად, შეიმუშავოს სამოქმედო გეგმა, მუნიციპალიტეტის ტერიტორიაზე ატმოსფერული დაბინძურების დონის შესამცირებლად გასატარებელი ღონისძიებების შესახებ;

3. ქალაქ ფოთის მუნიციპალიტეტის ორგანომ, საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტროსთან და საჯარო სამართლის იურიდიული პირის – ლ. საყვარელიძის სახელობის დაავადებათა კონტროლისა და საზოგადოებრივი ჯანმრთელობის ეროვნული ცენტრთან ერთად, შეისწავლოს ქალაქში, განსაკუთრებით დაბინძურების ადგილებში არა გადამდებ დაავადებათა სტატისტიკა და მოხდეს ყველაზე გახშირებულ დაავადებათა გამოწვევი მიზეზების კვლევა.

საქართველოს კონსტიტუციის 29-ე მუხლის პირველი პუნქტის შესაბამისად, ყველას აქვს უფლება ცხოვრობდეს ჯანმრთელობისთვის უვნებელ გარემოში, სარგებლობდეს ბუნებრივი გარემოთი და საჯარო სივრცით. ყველას აქვს უფლება დროულად მიიღოს სრული ინფორმაცია გარემოს მდგომარეობის შესახებ. ყველას აქვს უფლება ზრუნავდეს გარემოს დაცვაზე. გარემოსდაცვით საკითხებთან დაკავშირებული გადაწყვეტილებების მიღებაში მონაწილეობის უფლება უზრუნველყოფილია კანონით.

„გარემოს დაცვის შესახებ“ საქართველოს კანონის მე-13 მუხლის „დ“ ქვეპუნქტის შესაბამისად, საქართველოს გარემოს დაცვისა და სოფლის მეურნეობის სამინისტროს კომპეტენციაა გარემოს დაბინძურების მონიტორინგის ორგანიზება.

„ატმოსფერული ჰაერის დაცვის შესახებ“ საქართველოს კანონის მე-20 მუხლის შესაბამისად, ატმოსფერული ჰაერის ფონურ მონიტორინგს მსოფლიო მეტეოროლოგიური ორგანიზაციის პროგრამების მოთხოვნათა ფარგლებში ახორციელებს საქართველოს გარემოს დაცვისა და სოფლის მეურნეობის სამინისტრო საჯარო სამართლის იურიდიული პირის – გარემოს ეროვნული სააგენტოს მეშვეობით.

„საჯარო სამართლის იურიდიული პირის – გარემოს ეროვნული სააგენტოს დებულების დამტკიცების თაობაზე“ საქართველოს გარემოს დაცვისა და სოფლის მეურნეობის მინისტრის 2018 წლის 19 აპრილის №2-255 ბრძანებით დამტკიცებული დებულების მე-2 მუხლის „ა“ ქვეპუნქტის შესაბამისად, სსიპ-გარემოს ეროვნული სააგენტოს მიზანი და ძირითადი ამოცანაა საქართველოს ტერიტორიაზე მიმდინარე გარემოს (ატმოსფერული ჰაერის) ხარისხობრივი მდგომარეობის მონიტორინგის სისტემების შექმნა და მათი ფუნქციონირების უზრუნველყოფა.

საქართველოს ზოგადი ადმინისტრაციული კოდექსის 96-ე მუხლის პირველი და მე-2 ნაწილების შესაბამისად, ადმინისტრაციული ორგანო ვალდებულია ადმინისტრაციული წარმოებისას გამოიკვლიოს საქმისათვის მნიშვნელობის მქონე ყველა გარემოება და გადაწყვეტილება მიიღოს ამ გარემოებათა შეფასებისა და ურთიერთშეჯერების საფუძველზე. დაუშვებელია, ინდივიდუალური ადმინისტრაციულ-სამართლებრივი აქტის გამოცემას საფუძველად დაედოს ისეთი გარემოება ან ფაქტი, რომელიც კანონით დადგენილი წესით არ არის გამოკვლეული ადმინისტრაციული ორგანოს მიერ.

ზემოხსენებულიდან გამომდინარე, 2020 წლის 2 ნოემბრის ელექტრონულ პეტიციით გათვალისწინებულ საკითხთან დაკავშირებით ინფორმაცია გამოთხოვილ იქნა ქალაქ ფოთის მუნიციპალიტეტის მერიიდან.

ქალაქ ფოთის მუნიციპალიტეტის მერიის 2020 წლის 25 ნოემბრის №42-422033019 წერილის შესაბამისად, მუნიციპალიტეტის მერია გამოთქვამს მზადყოფნას პეტიციასთან დაკავშირებით გატარდეს მოქმედი კანონმდებლობით გათვალისწინებული ღონისძიებები.

საქართველოს ორგანული კანონის „ადგილობრივი თვითმმართველობის კოდექსი“ 86-ე მუხლის პირველი პუნქტის „ა“ ქვეპუნქტის შესაბამისად, პეტიციის წარდგენის უფლება აქვთ მუნიციპალიტეტის ტერიტორიაზე რეგისტრირებულ ამომრჩეველთა არანაკლებ 1%-ს. ამავე, კოდექსის 86-ე მუხლის 24-ე პუნქტის შესაბამისად, მუნიციპალიტეტის საკრებულო უფლებამოსილია, ამ მუხლის ნორმების გათვალისწინებით, მუნიციპალიტეტის საკრებულოს დადგენილებით განსაზღვროს პეტიციის ელექტრონული ფორმით წარდგენის წესი.

„ქალაქ ფოთის მუნიციპალიტეტის საკრებულოს რეგლამენტის დამტკიცების შესახებ“ ქალაქ ფოთის მუნიციპალიტეტის საკრებულოს 2014 წლის 24 დეკემბრის №21/56 დადგენილებით დამტკიცებული რეგლამენტის 119⁹-ე მუხლის შესაბამისად, მოქალაქეებს უფლება აქვთ პეტიცია წარმოადგინონ ელექტრონულად. წარმოდგენილი ელექტრონული პეტიცია აკმაყოფილებს საქართველოში მოქმედი კანონმდებლობის მოთხოვნებს.

საქართველოს ორგანული კანონის „ადგილობრივი თვითმმართველობის კოდექსი“ მე-16 მუხლის მე-4 პუნქტის შესაბამისად, მუნიციპალიტეტი უფლებამოსილია სახელმწიფო პოლიტიკის გამტარებელ ორგანოსთან კოორდინაციით განახორციელოს გარემოს დაცვის ღონისძიებები.

საქართველოს ორგანული კანონის „ადგილობრივი თვითმმართველობის კოდექსი“ 54-ე მუხლის პირველი „ე.ვ“ ქვეპუნქტის შესაბამისად, ქალაქ ფოთის მუნიციპალიტეტის მერი მისი უფლებამოსილებისთვის მიკუთვნებული ცალკეული საკითხების შესასწავლად, შესაბამისი დასკვნებისა და რეკომენდაციების მოსამზადებლად ქმნის სათათბირო ორგანოებს, მათ შორის, საბჭოებს, კომისიებს და სამუშაო ჯგუფებს.

აღნიშნულიდან გამომდინარე:

მუხლი 1.

1. ქალაქ ფოთის მუნიციპალიტეტის საკრებულოში წარდგენილი 2020 წლის 2 ნოემბრის პეტიცია (მომხსენებელი: ელისო ჯანაშია, მცხოვრები: ქალაქ ფოთის მუნიციპალიტეტი, ბარათაშვილის ქუჩა N 37-ში) დაკმაყოფილდეს.

2. ქალაქ ფოთის მუნიციპალიტეტის მერმა:

ა) დროის მოკლე მონაკვეთში (მაქსიმუმ ერთი კალენდარული თვე) შექმნას სამუშაო ჯგუფი (არასამთავრობო ორგანიზაციების და ადგილობრივი სამოქალაქო აქტივისტების ჩართულობით), რომელიც შეისწავლის და საჯაროდ წარმოადგენს ანგარიშს წლების განმავლობაში ქალაქ ფოთის მუნიციპალიტეტში არსებული გაუსაძლისი სუნის გამომწვევი მიზეზების, ამ მხრივ გაწეული საქმიანობისა და პრობლემის აღმოფხვრის გზების შესახებ;

ბ) დროის მოკლე მონაკვეთში (მაქსიმუმ ერთი კალენდარული თვე), ცენტრალური ხელისუფლების სათანადო ორგანოებთან ერთად, შეიმუშავოს სამოქმედო გეგმა, მუნიციპალიტეტის ტერიტორიაზე ატმოსფერული დაბინძურების დონის შესამცირებლად გასატარებელი ღონისძიებების შესახებ.

გ) საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტროსთან და საჯარო სამართლის იურიდიული პირის – ლ. საყვარელიძის სახელობის დაავადებათა კონტროლისა და საზოგადოებრივი ჯანმრთელობის ეროვნულ ცენტრთან ერთად, შეისწავლოს ქალაქ ფოთის მუნიციპალიტეტში განსაკუთრებით დაბინძურების ადგილებში არაგადამდებ დაავადებათა სტატისტიკა და მოხდეს ყველაზე გახშირებულ დაავადებათა გამოწვევი მიზეზების კვლევა;

დ) განახორციელოს ყველა ღონისძიება რაც დაკავშირებულია 2020 წლის 2 ნოემბრის პეტიციის მოთხოვნების შესრულებასთან.

3. ქალაქ ფოთის მუნიციპალიტეტის მერმა (გოჩა კურდღელია) აღნიშნულ განკარგულების შესრულებასთან დაკავშირებით გამოყოს პასუხისმგებელი პირი/პირები და პერიოდულად საკრებულოს წარუდგინოს ინფორმაცია გატარებული ღონისძიებების შესახებ.

4. აღნიშნული განკარგულების შესრულების კონტროლი დაევალოს ქალაქ ფოთის მუნიციპალიტეტის საკრებულოს ქონების მართვისა და ბუნებრივი რესურსების საკითხების კომისიას.

მუხლი 2.

საქართველოს ზოგადი ადმინისტრაციული კოდექსის 52-ე მუხლის მე-2 ნაწილის, საქართველოს ადმინისტრაციული საპროცესო კოდექსის 22-ე მუხლის მე-3 ნაწილის, საქართველოს ზოგადი ადმინისტრაციული კოდექსის 178-ე მუხლის შესაბამისად, განკარგულება შეიძლება გასაჩივრდეს დაინტერესებული მხარის მიერ გაცნობიდან ერთი თვის ვადაში, ფოთის საქალაქო სასამართლოში (მისამართი: ქალაქ ფოთის მუნიციპალიტეტი, დავით აღმაშენებლის ქუჩა №3).

მუხლი 3.

განკარგულება ძალაშია 25 ნოემბრიდან.

საკრებულოს თავმჯდომარე



ბექა ვაჭარაძე